

A-bú ê Sim-siaⁿ

Ngá-kî

Iáu ē kì-tit 2000 nî hit 1-tang, Tân-ôan siā-hoe ūi-tiōh sóan chóng-thóng ê tāi-chì nāu-jiát kún-kún. Hit-tong-sî-á góan tau mā án-ne, ták-ê lâng lóng ū ka-kī ê siūⁿ-hoat, chhù--nih tiāⁿ-tiāⁿ lóng ē ū chin chōe thó-lūn.

Hit-chūn, góa tú teh chún-pī khó tāi-hák, sim-chêng chin bái, tú-tiōh sóan-kí ê tāi-chì hóe-khì tiōh chin tōa, A-pà kap A-bú lóng sī chi-chhî A-Píⁿ--á..ê, góa sī bô siáⁿ-mih chhù-bī, kan-taⁿ khòaⁿ in teh crazy. Hit-tang-chūn, góa ē kì-tit A-bú sì-kòe khà tiān-oe hō--lâng, kiò in tiōh-ài chi-chhî Tân Chúi-píⁿ. Góa bô hoat-tō kóng chhut hit-chūn A-bú sī ū jōa hoaⁿ-hí.

Ū 1-kang àm-sî-á, góa àn hak-hāu tò-tíng--lâi, tī koe-á-téng khòaⁿ-tiōh Tân Chúi-píⁿ ê thôan-toaⁿ sì-kòe poe, tú-á-hó góa sim-chêng bô kài hó, tíng kàu chhù--nih tiōh kap A-bú sio-mā, chhá kah kui chhù-piⁿ lóng chai-iáⁿ. Góa kā A-bú kóng ài khì Tân Chúi-píⁿ ê kēng-sóan chóng-pō kiò in chhú-lí. Siōng bô, mā ài kiò in kā thôan-toaⁿ khioh hō chheng-khì. Bóe--á, A-bú 1-ê lâng bô kóng siáⁿ tiōh cháu--chhut--khì-ah, chiâⁿ kú lóng bô khòaⁿ-tiōh i tíng--lâi, sió-tī chin hôan-ló, kín tòe chhut-khì khòaⁿ, chiah chai-iáⁿ A-bú 1-ê lâng tâuh-tâuh-á tī koe-á khioh thôan-toaⁿ.

Chit-má Tân Chúi-píⁿ tòng-sóan--ah, A-bú sòa bô koh khah hoaⁿ-hí, i tī chhài-chhī-á bōe mih-kiāⁿ, seng-lí sòa jú lâi jú bái, m̄-kú iû-gôan m̄-bat thiaⁿ-tiōh A-bú teh mā Tân Chúi-píⁿ, i kan-taⁿ tiām-tiām bô beh koh kóng chèng-tī ê tāi-chì. Góa siūⁿ, i èng-kai tòi sin chèng-hú koh ū 1-kóá hi-bāng, m̄-kú chit-ê hi-bāng m̄-chai tang-sî chiah ē-tàng ôan-sêng.